

Cur che quescher daventa in putgà

DA BERNARD CATHOMAS

■ **I dat ina lescha nunschritta, mo tutti na sacrosancta sin plaun local e regiunal: Tgi ch'ha bandunà in uffizi duai quescher e betg sa maschadar publicamain en quai che ses successurs fan.**

Anteriurs commembers da suprazstanzas communalas ed er ils vegls cussegliers guvernativs grischuns sa tegnan da princip vid questa regla. Auter è quai tar ils anteriurs presidents da l'America che prendan posiziun ditg suenter lur temp d'uffizi, sch'i fa basegn. Obama ha gist quests dis ditg in pèr vardads a Trump. Er ils anteriurs cussegliers federals na taschan betg adina – bain savend che lur posiziuns chaschunan magari fermas discussiuns. In exempel da l'ultim temp: Cur che Eveline Widmer-Schlumpf ha ditg avant la votaziun dal

favrer 2017 che la proposta per las taglias d'interpresas na saja betg equilibrada han ses pleds probabel chaschunà in na dal pievel. Er Calmy-Rey, Couchepin, Blocher, Dreifuss ed Ogi na queschan tar tut. Koller, Cotti e Deiss da la pcd ma paran pli precauts. Pli pitschna la gruppa e pli sever ch'ella excluda ils anteriurs – ma er pli fitg che questas forzas mancan. En l'America ed er anc en Svizra datti blers che san s'exprimer sch'ils anteriurs exponents queschan. En in chantun e cunzunt en ina singula vallada sai vegnir scart, sch'in pèr han da taschair, essend anteriurs. Cun metter si buccarè als anteriurs exponents politics e da la societad civila va a perder savida ed experientscha, uschia che la debatta constructiva dad ideas e propostas vegn reducida e magari schizunt impedida. La reacziun da las gruppas pitschnas è chapibla. Ins vul evi-

tar ch'adina ils medems han influenza e cumondan. Ils novs duain mussar novas vias, e betg stuair tadlar «sin da quels che na san laschar dar». Quescher è in dretg da mintgin, mo na duess betg esser in sforz u ina fugia da la responsabladad ord tema da forsa offender insatgi. S'exprimer avertamain è il coc dad ina societad democratica. Quella na viva betg da quels che «fan da muntafuner» (sursilvan per in da testa dira che stat davos noda e tascha), mabain da quels che stattan si e din lur opiniun. Quels che prendan part, betg quels che sa zuppan e queschan, portan enavant la societad. Per mai n'èn betg quels che taschan ils sabis, mabain quels che gidan a chattar cumpromiss. Taschair è in putgà grev, cur che pleds clers da persunas cun paisa fissan urgents.

L'autur è pensiunà activ

